

四庫全書

集部

欽定四庫全書

集部

元風雅前集卷九至十二

詳校官通政使<sub>臣</sub>夢吉

助教<sub>臣</sub>常循覆勘

總校官庶吉士<sub>臣</sub>倉聖脉

校對官中書<sub>臣</sub>范來宗

謄錄監生<sub>臣</sub>龔果

欽定四庫全書

元風雅前集卷九

元 傅習 編

高若鳳

題朱進士御賜詩

憶昔霓裳清夢還  
廣寒宮殿鬱巔巔  
神龍久矣乘雲去  
猶有驪珠落世間

遊白鹿洞書院

碧瓦參差儼杏壇  
白雲深鎖洞門閒  
不宗朱氏元非學

看到匡廬方是山十里松風潮洶洶一溪泉雨佩珊珊  
便當卜築書臺近五老峯前任往還

送謝有源閩中醫官

出山只為有源長散作人間六月涼從此不憂丹荔渴  
寶塘一派冷於霜

班資高下不須論一步青雲亦上恩小試參差醫國手  
有人稱是野航孫

贈相士張月梅

清光萬里飛銀闕。晏天寒。桂香歇。含章殿是。廣寒宮  
月似梅花。梅似月。世間有梅。有開落。天上有月。有圓缺。  
乾坤清氣。鍾於人。千古不摩方寸鐵。月邪。梅邪。香莫辨。  
淨色含香。兩竒絕。西山有雨。南浦雲。反覆紛紛。異涼熱。  
搓仙老眼。閱人多。獨獨來尋。灞橋雪。月梅已寒。雪更寒。  
窮年三友。長相看。論詩論相。神自完。出門一笑。天地寬。

張叔暘

送滕玉霄

我恨江上水不能洗離愁又恨江上水不能為我留日  
黯黯雲悠悠胡不推出黃金毬照我一笑送沙鷗俎豆  
萬古相賡酬風流此老黑貂裘飲乾海水蛟龍愛人間  
雙鬢秋筆底巫峽流傲睨幾何同一漚識我不識吾何  
求安得從此長嬉遊昔日間今瀛洲江水洗得離愁不  
為我留住江上頭三百尺酒樓五百斛酒舟

許獻臣

次韻蒲平章致仕

君恩許老重增秩相印封回不再關石以補天還袖手  
雲能成雨便歸山力將富貴推身外倒捲乾坤入酒間  
綠野堂前看綠竹古今誰得似君閒

題賓月堂

人生自是人間客月亦天邊寄此身彼此虛空無着處  
誰歟是主復誰賓

趙蒙齋

題釣臺

君因卿相隱我為利名來羞見先生面黃昏過釣臺

倪中宣

贈張原性金華尉

天風吹雁秋影寒客子晨出燕城關青龍嘶烟雜錫鑾  
腰螭割玉羅翠乾金花出匣雙蚪蟠盪射嫠女光攔杆  
春萱花暖金樹合酒光入鬢顏渥丹風雲落筆神鬼泣  
眼見老鐵生詰盤朝棲崑崙圖夕飲砥柱湍但恨雲路  
無停翰東海百尺青琅玕



倪若水

過揚州

雉堞平來塹擁沙  
綠蕪深處見人家  
山河舊影藏秋月  
關塞新聲起暮笳  
玉蕊已為庭下草  
蒺藜不是眼中花  
當年鳳舸經行處  
枯柳無枝寄宿鴉

范德機

過西芹

路隱岩崖迥橋通屋舍重  
烏啼黃葉寺泉注白雲峯  
市

販賒柑柿畝耕間竹松行人報山郡失喜問萍蹤

延平江閣

山勢包平險津流合衆源詎知從事劍不類大夫魂光  
彩潛猶見精忠死尚存幽靈如可問吾意豈忘言

奉同廉訪使君泊寮友遊愛同寺

閩粵古城東千岩半梵宮冒寒尋水石盡日倚虛空鐘  
鼓何須急壺觴亦有終翩翩北海寺碑版翠無窮

寄武夷杜徵君

洞居清隱士時接武夷君  
旆影岩前見山香石上聞  
不為圭組累焉有市朝分  
暫得同麋鹿終朝試與羣

題張伯雨題東坊藻次韻

騷靈逝矣不堪呼  
幾欲南遊信楚巫  
城郭烟濤乘白帝  
星河風露挹黃姑  
幽人昔恨九關豹  
佳士今猶千里駒  
久客資君相慰藉  
可能無意謝飛鳬

送黃中庸歸吟

法樂洞前曾一遊  
君家聞處洞西頭  
石潭正照猿猱月

山藥曾經虎豹秋豈意吳城祠下路共尋揚子岸頭舟  
胸中富有天官學莫為周南久滯留

蓮房

憶得花神一笑懽六郎家住小江干佳人怨等秋風近  
稚子眠聽浦雨寒強為折來開戶牖誰將鎔出擬盃盤  
少年太守思兄弟戢戢青頭莫謾看

桂子

盡輸金粟三千斛換得瓊枝數點秋定是月中嘉種失

却從世上異香浮  
石岩夜見呼猿摘藥臼  
晴敲伴兔秋  
十月天台誰得見  
西風吹夢落山頭

送夏蘭同知會昌

承聞吉日上江船  
佐命分符落雁邊  
野館溪頭三晉雪  
山城留下七閩烟  
庭春花氣迷銅墨  
市暝溪聲學管絃  
何日周廬尋夜直  
倍知報政九重天

瀉露亭

初秋白露降  
爽氣迫虛幃  
薄林方沉沉  
洒漠復霏霏  
暗

襲玉堂梢斜飄金掌微鶴眠寒屢警螢火濕猶飛葉垂  
知月朗花艷怯朝晞蘭飲畏朝墜草露傷夕歸為霜當  
夙戒去日漫增欸悒停吳宮女三月採薔薇挹彼枝上  
香散入舞裳衣千歲亦不減但恐願相違君子保世澤  
在久愈光輝

題廣居家藏東坡竹

古籐尺五霜烟交不見長身見墨梢千載高風猶一日  
莫妨僂耳住無茅

贈廣居查尊師遠遊

查君學道戀名山廬結東南紫翠間更憶皇州春色好  
却辭仙館曙光間千年城郭逐人去八月星河奉使還  
莫為崑崙無覓處早將詩賦動江關

奉寄翰林鄧侍講

曩承持節江之東騎鯨再上蓬萊宮蓬萊仙人歌白鶴  
聲落五湖烟雨中世間爵祿不易致何獨去就如飄風  
朝廷禮樂須制作六經隱義資發蒙論思廟堂集耆碩

啟口寧讓前諸公閉門讀書古都市四輩冠蓋方隆隆  
我生生長在窮谷那有文字爭人雄謬蒙引喻百僚上  
負祿府署慚無功一別十年還又五昔者少壯今成翁  
誰知復客七閩下隔二千里來詩筒羸軀頓醒瘴癘惡  
賴以慰此心忡忡粵王城南浪白日粵王城西花正紅  
經石門鎮

搖落石門秋水清殘僧樓宇映沙明買船欲上吁江去  
路轉峯南聞雁聲



會約尋麻源不果

暫遠雲霞觀却希山水音珠星聯社下璧月動江潯始  
集寶氣亭復趨金精岑輟棹更垂釣推書時弄琴石門  
生佳景麻源籠曉雲是邦遇賢守佳致契幽尋樽俎迫  
清好絃歌彰古心羣中宜鳳集泓下或龍吟頗愧塵務  
通還為旅宿侵一行混吏執千載負圖琛既往事莫究  
于茲念方深姑山如有意遂許一登臨

順昌道中

冉冉秋序高勞勞客程促如何霜霰交不見原野肅顛  
岸絢夕紅古澗漾寒綠非惟藤葛敷亦復芳氣馥物生  
固有常氣候殊過續以茲羸疾身動往居瘴毒念彼閩  
村人田稀口如粟耕種上青雲妻孥力涼燠吁嗟公私  
弊羣需待其熟安得廉恥吏俾之食常足上以承恩光  
下以厚風俗丹心映皓首我何自拘束

玉臺

曉出玉臺道山川稍夷曠只愁灘石際磊落更萬狀市

樓倚崖岸山頂列石障是中更有人隱約惹情上我願  
從之遊長風涉玄閭還歸保精路高視神目王空濛飛  
鳥過慘淡回波放由來心力疲會意乃益壯

至懷安縣又入福州

山城列障駐餘霞水與長空遠映沙芍藥省中人望幸  
荔枝林外客思家遙遙徐市三神槎渺渺張騫八月槎  
蚤歲學遊今白髮不應猶戀聚如瓜

望潮曲

潮來直上青崖住潮住却尋滄海去烏石山頭望故鄉  
故鄉更在雲深處我生不如橋下水消息春秋任流止  
人不如如水上船去去來來年復年負祿旅孤二千里  
上念慈親下妻子子生未解別爺啼睡戀阿婆懷抱裏  
烏鴉日日傍人飛喜鵲時時噪群西更有平安書字到  
金壺約伴玉人攜

平臺晚懷

落日微風生晚涼平臺西上萬山蒼佳人獨不生同世

樂上那知是異方  
海岳雲霞千古意  
鄉關道路九迴腸  
丹青不寫歸田賦  
猶以虛名累霍光

寄李秘書洞

秘書出是蓬萊苑  
流落東吳又一春  
見月定懷騎鶴侶  
聞秋肯讓鱸膾人  
吾曹事業徒溫飽  
子等居諸異隱淪  
海表何時攜手再  
相憐同是老詞臣

送別周儀之推官赴錢塘并簡李四秘書

武帝龍飛第一春  
京華相送各沾巾  
詎知邂逅文身地

慙是棲遲皓首人  
山駟蛟眠星滿洞  
水鄉雁起月迷津  
若逢李洞南天竺  
謂是前書感謝頻

懷京中親友

海上經年思殺人  
絕憐京國舊交親  
過江惟有傳柑使  
寄得書回是暮雲

絕句

日淨芙蓉遠  
春明芍藥長  
誰怜玉蝴蝶  
正似錦鴛鴦

東署

習靜天常見居深路近通陰階垂葉露空院長春風

春日西郊

春風千里福州城綠水青山老送迎惟有垂楊偏待客  
數株殘雨帶流鶯

佳人不讓海棠嬌喜見天晴挹露饒若使有詩寧費日  
便令無酒亦終朝

江上登臺望眼迷西禪更在石岩西尋常楚嶠看花日  
此處新苗綠已齊

南澗清晨不易得有無更似此時春朱挑皓李都隨世  
紫蝶玄蜂故趁人

題先天觀圖

學仙之人與仙為徒住在匡廬之與江湖之區張公鍊  
丹作龍虎丹成御氣遊太虛後來出者絕代無何不學  
仙住玄都玄都之壇角井孤上摩萬里之黃鵠下伏千  
尺之饑飢陰森檜筠自太古斬種力與開闢俱扶桑朝  
日掛絕壁坐見樓觀青糝糊壁崖崆石瀉哀湍春秋雲



露芝田腴我亦人間山澤癯偶陪夔龍賓唐虞有時一  
醉黃公壚振風三日撼不蘇折花不得渡弱水渾手始  
識仙凡殊玉堂學士范與吳遺我茲山之畫圖尋窓數  
戶久歎息無因置我雙槇蒲獨行幽人不受呼掃葉青  
澗聽啼鳥日暮蘿徑相縈紆縈紆向何處明朝為偕  
麻姑鵬我亦騎之天上去

孫存吾

錢虞伯生歸隱

天地毓精英文章耀德星虞庭春色滿翰苑月華明歸  
隱琴書樂朝回軒冕輕凡才情俱蓄藥籠徧參苓

春日遊黃鶴樓

挿天棟宇接雲霞八面玲瓏望眼賒寒谷春回江夏柳  
晴川日映漢陽花珠簾半捲琉璃滑宮扇初開翡翠斜  
日近天人聆笑語廣寒宮殿隱仙家

秋思

雁落秋風字字沉嫩涼偷入藕花心眼前多少關心事

付與寒虫徹夜吟

張息堂

題手卷

陽水謙卦妙入神當時鐫刻知何人至今寶玩逾琬琰  
字體精勁無失真謙謙子謙能辨此手揮鐵毫出文字  
功成何止地中山鑿破乾坤六十四

元風雅前集卷九

欽定四庫全書

元風雅前集卷十

元 傅習 編

甘東溪

夜坐

林風自瀟瀟  
山雨時洒洒  
丈夫七尺軀  
地爐使吾矮

早睡

病來貪睡早  
推月出山前  
月色不相捨  
小窓還自妍

酒醒

酒醒桂花發狂歌對花前隣家大罵我夜半驚人眠

書生

踉蹌趨講席讀誦闢高聲我亦曾如此而今白髮生

歸舟

片帆懸空秋滿腹涼月淡淡天無波平生湖海元龍意  
早入西風漁棹歌

天壤豈無蘇季子恨我不識韓荊州遙山蒼蒼暮雲碧  
何許一笛蘆花秋

下豫州

壯懷忍共白雲閒  
孤負僧房屋半間  
賣盡牢愁三萬斛  
載將明月入西山

托意

舊時燈火不知年  
托意篇章末世傳  
胸次只今無此事  
聽風聽雨過殘年

新春

花紅柳綠也逢時  
潤色青春春有小時  
人世若無吾輩在

東風寥落亦堪悲

看梅

獨坐匆匆不自適  
出門偶見梅花開  
自從開闢到今日  
此是東風第幾回

暫憇

平生湖海遊南北  
東西路幾度夢殘時  
雲深不知處  
過南湖小酌

忽有一事碍胸次  
擺脫不得呼酒來  
溟溟濛濛混沌在



坦坦蕩蕩虛空開精神半生留筆墨形骸昨夜為樽罍  
年年看梅今白髮晴日江路行莓苔

薩天錫

采石驛

客路青山外鄉心落照邊潤清浮野樹涼雨過淮天水  
調誰家笛江帆何處船蛾眉亭上月今夜照孤眠

采石懷李白

夢斷金雞萬里天醉揮禿筆掃蠻箋錦袍日進酒一斗

采石江空月滿船金馬重門天似海青山荒塚夜如年  
抵應風骨蛾眉雪不作天仙作地仙

過石子崗

霞光日落紅穿樹山色雨餘青近人便好拂衣入山去  
解鞍辭却馬頭塵

次王叔能侍御史

龍蛇偃蹇出牆陰五色春雲態度深臺閣文章散清氣  
月明山館夜蕭森

次繁昌邑宰梅雙溪韻

矍鑠繁昌宰曾充觀國賓  
儒冠猶破帽禮服尚垂紳  
淡泊心無愧清癯自有神  
老脣朱紱貴驚見白頭新  
撫字三年改歌謠百里民

林彥棗

元會習儀和鄭子完

西山晴雪照階墀  
法曲天香會合時  
在野只知堯帝力  
進朝方識從官儀  
日明黃道瞻丹扆  
春滿青都擁翠旗

冠佩又承新雨露太平報效有深期

李源道

次韻送虞伯生使蜀降香

城南尺五去天低回首彤樓十二梯  
六月岷山猶有雪三春雲棧迥無泥  
浣花溪上看秧馬芳草渡頭聞竹雞  
見說草堂遺構在公餘須到錦城西

夏果齋

和山間秋日見寄

門前絕竹築成坡室邇其如人遠何亦曉不如歸去樂  
真成無可奈何歌詩翁自此工難少俗子于人一揖多  
何日同君秋月下桂花影裏舞婆娑

過洞庭

萬里玻瓈一掌平倚篷人去似騎鯨掃除雲霧天無影  
彈壓波濤夜不聲一劍秋橫神鬼泣片帆風勁死生輕  
詩成不用漢人語怕有蛟龍聽得驚

上國簽事時作教諭已四年

早年化筆妙衡詮，  
撲著莠意藹然名節繡衣霄漢上。  
精神玉樹晚風前，  
古人針芥纔三語，  
今得齏鹽已四年。  
昨夜書惟光彩動，  
使星炯炯斗牛躔。

過岳縣

水紋如席浪花收，  
誰遣湘中鹿角舟。  
白露已過秋日淡，  
青山未了曙光浮。  
諸賢豹變雲生足，  
老子龍鍾雪上頭。  
可惜隔江燈數點，  
匆匆過却岳陽樓。

送王副使美解

瓜戍無情迫歲年歸期行色占春先  
南商北賈多遺愛  
剝水殘山有宿緣青柳一枝江上酒  
碧波千里月明船  
衣冠文物傳江左好在家聲續昔賢

胡斗南

悼文山

烈指西風感別離乾坤人物大奇奇  
生為孝子忠臣勸  
死有皇天后土知萬折江流魚腹石  
千年人立首陽碑  
一門史氏春秋筆愁把湖光入畫時

陳中山

錢理伯容調江西憲掾

五阮春官第重登憲府新人皆形迹避君獨肺肝真日  
飲瓢惟水風行篲掃塵明朝江右客秋色滿湖濱

奉題丁氏竹堂并寄廷玉嚮仰之意

慈州二判經年別黃鶴山前見阿咸聞築新堂臨水勝  
刺裁脩竹與雲叅午風窓戶清含雪晴日琴書翠滴嵐  
欲拉王猷時共造幅巾揮塵縱清談



錢郭端友赴掾巴陵并寄希仁兄問訊之敬

送客巴陵目遠鴻  
英年嘉樹玉菁蔥  
門趨畫戟諸侯貴  
地閱輿圖七澤雄  
極浦揚舲清漳濶  
亭衢遷轡碧霄通  
別來安穩懷鄉否  
須問年同勦贊公

題甘文卿杏隱卷

補子洲前萬杏花  
一壺仙隱客成家  
抄書簷下分香露  
洗藥溪邊踏錦沙  
布素屢煩卿相揖  
劍芒終拂斗牛斜  
曲江又廢明年會  
栽樹何由見綺霞

餞姜華甫調武陵掾

府史才猷俊沿書調武陵  
秦袍懷舊澤肱被割秋綾茗  
椀菜莢苦艸缸杜若馨滄浪濯纓處搔首憶吾曾

宋梅洞

挽胡宣慰

搏虎鬼猶泣屠龍地亦沉  
無兄寧有昔有弟必無今  
鐘鼎他人手舟車過客心  
不堪回首處殘月墮花陰

哭岳山

天意只如此將軍重可傷  
忠無身報主怨有骨封王  
苔雨樓牆暗花風廟路香  
沈思百年事揮淚對斜陽

龔子敬

送楊起行

纓冠楚楚濯滄浪  
彼美人兮淇水陽  
大府久須唐令錄  
中州正用漢文章  
忠貞滿眼真能幾  
遲莫相看耿不忘  
至治朝廷天咫尺  
載歌丞相舉賢良

送秦俗之補南臺掾

南臺禮意特相招送客溪亭自寂寥  
夜雨燈前春幾許清風扇底暑全消  
中司執法分曹掾掌政名臣佐使軺  
捧檄還應為親喜宦途等是上雲霄

題張氏所藏石經

洛溢河清世之季鈞黨諸賢死無避  
橋門冠帶此何時

詔與

一作為

群經正文字議郎郎將工隸書觀者續紛門

外車似憂方冊重灰

一作煨

燼且可鑄篆辨魯魚南臺四

部存几磧誰見世間完六籍漢傳區區掇拾方到今不

是糊塗墨

一作家

述懷東張仲實教授

霜清起病骨卧久忘籬篠殘息不暖衣短髮漸入梳涉  
世何用早意適事不如既知非所能裁足不顧餘藥苦  
尚可飲家貧難可居秋來窘繁陰百畝沉嘉蔬滯穗尚  
采掇吾生愧耕鋤南窓美朝陽昔賢遺古書風竹如應  
門一室自掃除西庠張公子為我日回車言笑適相娛  
綢繆焉得疏

掘山藥歌

綠薜紫藤綳色子種玉綿延春透髓晴虹歲晚香不起  
托命長鏡山谷裏小隱墻東塹藥欄刷玉政得才藥藥  
服食相傳養生訣茂陵劉郎和露啜

病起試筆十韻

積雨迷空濶翩翩多去舟將家值早濕無事得清幽安  
石非高卧文園已倦遊壯心適如意短髮寄搔頭病約  
山容瘦閒窺雁影浮雙扉寒自語一榻淡相留香篆縈

紆晚畫屏瀟洒秋黃花荒古道白日起滄洲不死千金  
藥平生百尺樓暫分仙枕夢遙訪羽人丘

謝陳壺天惠蟹

寒浦縛來腸已無枯骨裹肉肉自腴為君喚醒江湖夢  
孤篷細雨聲相濡貧家不辦滿眼酤糟頭酒滴紅真珠  
起來獨坐秋風裏一徑晴寒菊數株

梁隆吉

題葉東叔賓月堂

人生自是人間客月亦天邊寄此身彼此虛空無着處  
誰歟是主復誰賓

李古淡

題子卿牧羊圖

自是天工肯放回回頭羞殺望鄉臺漢風吹散羝羊隊  
却入麒麟隊裏來

李誠泉

寓洪中秋翫月



金水鎔成一樣秋三千世界雪光浮城中見月能多少  
擬借仙人十二樓

彭容庵

贈彭鐵面相士

只戴黃冠不豸冠雙眸窈碧見蒼寒江南多少秋風客  
蘇若山人一咲難

仇近仁

潮

一痕初見海門生頃刻長驅作怒聲萬馬突圍天鼓碎  
六龍翻背雪山傾遠朝魏闕心猶在直上嚴灘勢始平  
寄語吳兒休踏浪天吳象罔正縱橫

吳漢儀

贈楚山樂路教之金陵謁御史

官滿宮城車載膏遠從建鄴覓同袍雨香芹泮春風轉  
霜重拍臺秋氣高青眼故人加顧盼丹心即日表英豪  
金陵山水多佳麗伴客登臨莫憚勞

吹簫歌贈金精山人陳天祐

金精之山何嵒崑夜深明月涼蕭蕭中有可人好絲竹  
抱明月兮吹洞簫簫聲嗚嗚响空碧潛蛟起舞山魃泣  
含宮嚙羽妙入神月落參橫朔風急曲中却憶秦樓女  
秦樓縹緲知何許嗚鳳雙飛竟不還至今遺事傳千古  
君留吳中猶未發我亦知君調殊絕明朝却賦歸去來  
吹簫還弄金精月

元風雅前集卷十

欽定四庫全書

元風雅前集卷十一

元 傅習 編

何願貞

長沙留別董仲遠陳君直

歲晚客衣薄揮毫更舉杯  
五年嗟一別兩月却重來  
南屋夜相語北風船未開  
他年茗雪上回首定王臺

黃子庸

古意呈仲章貢侍御

娉婷二八女絕色妙難畫  
新粧薄鉛華照影脩竹下  
威年事夫婿錦玉耀精舍  
雖非伯鸞妻惓然惜春夜  
琴餘月當軒默默倚風榭  
寄語東家兒紅顏莫輕嫁

梧桐生高岡雲氣涵空清  
南枝掛孤月上有蒼鸞鳴  
大匠揮玉斧渾然合天成  
置之白玉堂被之絃歌聲  
一彈松風來再鼓溪月明  
子期人已往青山為誰情

題竹外一枝梅花

仙標何處來一寒倚寒玉  
晴窓見疎林座上春可掬  
山

陰帶殘雪水影兼遠綠珍重孤竹君歲寒伴幽獨

題醫人黃子厚

悠悠溪上山疊疊山下雲幽人不出戶芝草日以春伯  
也種丹杏心與孤鴻輕仲也搗玄霜西風林間聲世降  
運不齊病隨人心生芳草何所無誰能擷其英吾宗幼  
方積積久用更精金丹有時合白日昇蓬瀛

春晚

春老他鄉奈老何可人紅紫漸無多閒來綠柳坡頭路

記得流鶯第一歌

題春江小景圖

小艇無人載綠陰  
白鷗門外笋成林  
不知多少山中雨  
染得一江春水深

錢塘懷友

舟泊風林一雁聞  
白蘋紅蓼共思君  
月明江水多於海  
雨後秋山碧似雲

登福山遇僧偶出



欲叩禪關未有詩  
滿山空翠濕人衣  
竹間倚杖到西日  
試看白雲歸未歸

驚嶺雲間杖屨幽  
竹風松影共悠悠  
何人分得僧家榻  
坐看南山一片秋

贈江玉成

千里還家獨抱琴  
象山杳在白雲林  
晚寒莫厭江東路  
人倚梅花雪意深

友人見訪不遇

君乘白鶴下青雲我入春山聽曉鶯  
可惜小樓風雨過無人收拾萬松聲

尋故人

適興一尋君君家在白雲幽花春後見落葉夜深聞  
隨意坐苔石呼童煮澗芹不須談世事詩思正紛紛

留別

相尋復相別把酒意如何雲石有時合風湍無定波  
此生無出處一笑對蹉我長揖下山去暮烟浮女蘿

哭朱教授竹所

日問平安竹淒然泣白鸞講堂春寂寂歸路夜漫漫前  
度成虛設斯文已不刊此聲雲谷外落葉帶微寒

天運不已歲時人春學已可乎作自勉詩呈李

初教授諸公

東風一笑可人心旋瀝新醅對客斟山色未勻春意淺  
梅花已老白雲深半軒依竹閒聽雨千里懷人欲抱琴  
試問樵溪隔年意碧波東注渺難尋

送三山張國寶府掾美歸

三山星斗高貼天三山潮汐走百川張公平生飲中仙  
襟度脫落神飄然三山神人不敢友天風吹度金鬕顛  
掃清案牘待明月平鋪綠水栽紅蓮公庭無人山色落  
時有雙燕歸簾前樵溪夜雨深一尺城外明朝翠如織  
春歸草木不可遮黯淡已作離別色離別兮奈何若有  
人兮佩女蘿公不顧兮山之阿山之阿滄海渺渺浮雲  
多

縣令行

石田海上秋不熟抱琴入山翠如簇白雲一榻流水深  
獨對青松結茅屋西風喚起泥塗身野冠未見天上人  
靈丹一粒肯分與便當負水耕炊薪

題高都事戴崧二牛圖

東風吹浪翻平林吳江咫尺移春陰牧童曉出不知雨  
日暮歸去清溪深一童驅牛涉古岼草烟慘淡迷目觀  
雙蹄湧出層水間蒼峽蹴翻石雲斷一童踞策溪中流

溪風不動波悠悠恍然顧影驚自失尚疑身跨蒼龍遊  
平瀾遠峯結寒色至今宇宙留墨跡可憐三子人不識  
我欲問之漢津客

送素庵劉提管歸

當年繡斧出九天倏如白雪下長川千峰收雨作秋色  
至今梧竹吟寒泉熙臺重來又三載干將出匣光不改  
冰壺盡貯明月秋風露冥冥接滄海海空迢迢行玉麟  
霜影蕩漾龍蛇驚石田歸來紫芝好策馬更入南山青

南山歌兩岐何如陽春生物物不知魯人頌泮水何如  
弦歌一千里昆也虎渡河寬也蒲作鞭何如樵溪九曲  
落葉靜平鋪綠水栽紅蓮紫薇殿前列蒲輔華蓋滄滄  
五色聚夔龍蹶蹶天一方蟋蟀吟秋挂枝暮蓬萊楓葉  
昨夜秋瓊樓夢覺題金甌銀河橫白鸞去安得追逐釣  
天遊

送僧定觀歸

詩僧百丈來復作五臺別丁然振金錫桂子落秋雪山

空白雲閒風息萬籟滅相思何處無江湖一明月

張希孟

過長白山范文正公書堂

長白何岩巖下有讀書室人云小范老于焉競晨夕蕭  
蕭翳荆榛落落林泉石卷卷往瞻拜共共如相及維宋  
慶厯間群賢麟鳳集孰先天下憂一統經綸白中朝固  
有人西夏諒難國力言出師凶深慮手澤失炳幾先見  
明韓富有慚德奈何時相隘欲碎和氏璧向非仁廟知



千載血應碧至今忠義氣高壓萬仞壁所以德業高要  
知辛苦積功臣自古多動為富貴後視公平生心霄壤  
邈相隔但能一善兼亦足千年塞遺容揭日星未覺關  
塞黑長歌景行詩風林撼秋色

晨興用俞立之韻

寒碧洲痕淺深青地勢平岩姿呈雅淡樹影碎空明窓  
納一天曉人懷千古榮移床高處坐遙看日東生

惜鶴十首

鶴仙禽也由凡翼非其比恒不為世人所愛而愛之者往往皆山林中人蓋物以氣合理勢然也余嘗得其尤者一鵒之既久翩躚與人相習日者為田姬傷其脰丸病兩月斃惜哉因取其始末作十詩將以慰其不幸云爾

購鶴

野處幽獨甚千金得令威挾雲出塵網領月到柴扉  
足妨颺去遮亭使學飛至今湖上路樹石亦光輝

友鶴

雲雨手反覆紛紛知已誰玄裳真莫逆皓首誓相期把  
酒或前舞遊山時後隨會看作人語細與話瑤池

病鶴

渠本仙家物胡為久不安強行時搗翼歌立欲遺丹誰  
藥相如渴獨憐范叔寒一鳴雖確確猶自徹雲端

醫鶴

鎖藥人空數乘軒氣漸低無心吞餅餌何處覓刀圭暴

日資丹火杯泉洗雨泥謾令通臂友時復憶幽棲

挽鶴

共處人烟外誰期禍及身九臯空有恨四野欲無春  
華表雲應唳瑤臺月亦塵當年林處士泉下定相親

招鶴

歌徹楚人些冥冥恨亦增楓林空落月蕙帳亦寒燈  
仰問天無語呼聞谷謾應料隨風露氣飛入亂山層

瘞鶴

非為恩帷蓋從遊歲月深忍令一抔上埋盡九臯心致  
奠撼幽憤為銘著德音小松栽尺許悠久庶能尋

憶鶴

玉立昂藏意山中我與君幾年遊賞共一夕死生分徐  
步閒窺沼高飛遠帶雲為誰重起舞倚杖立斜曛

夢鶴

繡幌燈昏處依依見瘦軀引吭如有訴側頂不容呼枕  
上行雲遶松稍落月孤堪憐漆園叟謾為蝶遽遽

圖鶴

百計無從見明窓吮筆圖研朱漆霞頂屑玉抹雲襦雅  
狀雖非似山居亦勝無却愁風露夜拔宅上天衢

趙茂原

贈郭上長歸括蒼兼簡葉縣尹林府判二公

夜聽春雨鳴雨晴君欲行君行向何處回覽括山青括  
山萬疊青未了漠漠寒烟隔飛鳥三年官冷不得歸歸  
夢時時度雲嶠竹鷄鉤輶啼夢殘落花如雪春風寒客

途塵土何漫漫握手未許攀征鞍東關且盡雙樽歡東  
關柳如帶中有別離態折柳不可持依依自相待宦遊  
江海事多違我輩論交金石在舉頭咫尺天涯別行李  
蕭蕭浸明月出門大笑心激烈良儔往往多契濶每一  
思之生白髮白髮生何足驚志士慷慨期晚成酒澆磊  
傀澆不平況復不飲難為情長歌散作陽關聲子先歸  
兮我暫停丈夫耿耿氣肯洒兒女淚浩蕩天地間清流  
豈常聚郭公子休徘徊京城二月鶯花開束書早上黃

金臺黃金臺上多英才拾取青紫實快哉秋來我亦遠  
遊計萬里殷勤定相遇到手功名俱得意却誦如今長  
短句

曉寒曲

曲欄廉纖杏花雨博山烟飛裊晴縷夢回金帳春融融  
鸚鵡驚寒隔窓語美人曉粧雲滿梳抑風吹香入氍毹  
翠鬟嫋嫋綰不斷寶釵壓鬢紅珊瑚了鬟捲簾採桃葉  
驚起一雙黃蛺蝶



秋宵吟

平林薄暮風浙瀝黃金滿地秋狼藉新月出嶺光欲流  
萬籟無聲夜寥閒誰家美人吹鳳簫彩鷺對舞摩青霄  
攔杆縹緲碧雲遠天風入骨涼蕭蕭銅壺水寒銀箭澁  
玉露滴空衣袂濕缸花落盡爐烟收幽懷耿耿生新愁  
寒蟬啼碎人間秋

揚達可

渡江寫懷

手挽天河落九溟  
浪聲淘盡世間情  
一川光浸梅花月  
萬頃波涵棣萼春  
風雨不忘歸海意  
乾坤未老濟川人  
此溪浩蕩流千古  
回首青山更麼青

吳仁傑

送汪水雲入湘

碧水波翻海亦摧  
奮身鼉背護蓬萊  
忍隨天上紅雲散  
却馭關中紫氣回  
大道有形須變化  
玄關無鑰任敲推  
攜琴更拜蒼梧野  
猶想南薰入調來

鄧或之

即景

樹影禽聲門半開  
牆東一徑沒蒿萊  
池塘通得官溝水  
時送青萍幾點來

絕句

清風左右涼滿室  
芷花香琴聲偶然斷  
不是客來妨

芸芸陌上人

芸芸陌上人各為衣食謀  
寒饑稍不迫彼亦無誅求

豈知衣食外復有千端憂憂樂本皆然悵然寸心休

掩卷

夢中有得意覺來還自喜掩卷嗒無言殘日在書几

江橋樹次阮魯詹韻

江橋樹荏苒年華暮迎得行人來送得行人去落葉成  
秋風行人在何處

阮書附

江橋樹日日斜陽暮春風吹落花半隨流水去花落有

盡時水流無斷處

宿山家

秋深客路已無聊  
此宿何堪更寂寥  
雨葉响林人語寂  
風燈近竹客心搖  
村醪味薄愁先醉  
野叟情親語漸驕  
惟有兒童忘世故  
向人歌斝到明朝

聽琴

松花門巷小立久  
忽聞琴海鶴天風  
急山猿秋雨深一  
時甚得趣千載有  
知音雖是無絃達  
何由會此心

落葉二首

秋庭晝無人夜葉自滿地  
端居觀物化人生亦如寄  
朝聞鳴蟬悲夕已見其蛻  
歲晏共蕭條臨風發遙唱

落葉日已深庭樹日已瘁  
樹猶不枝梧葉亦甘委棄  
寧隨風高飛毋隨流水逝  
飛者或遶樹逝者渺無際

陳敬翁

晚過玉林西齋二首

佳客因乘興能來慰寂寥  
空山多宿約好語在今宵  
白

亭秋風急青帘市酒遙半升無處問清抱可能消  
庭雨俱垂盡燈花待客詩三生今夜宿此道幾人知分  
契情何厚林高語自奇直為知己用非敢傲當時

月下琵琶

不似潯陽縣哀絃帶客愁素蛾窺夜曲明鏡入南洲指  
滑鶯初語腔新柳共柔向前兒女恨腸斷漢宮秋

柳邊漁笛

莫是章臺路青絲舞未收楚江歸去釣湘竹語孤舟一

葉秋生樹何人夜倚樓舊時明月裏吹過白蘋洲

初夜

獨坐興悠悠苔階日脚收客衣涼悞葛池月夜私秋物  
遣身猶累心閒逕未幽故人情分好渾不記淹留

晚坐

綠陰深處寺日暮坐幽人水影光初劫苔痕塔半身荒  
江無過客高竹是比鄰未信清談少因看麈尾塵

過胡震亨幽居



欲復問何處行遲稍認門路隨幽草入巷與綠陰分市  
盡人初遠言忘意獨存所經得才俊猶足慰斯文

清曉過鶴上仙人

仙人睡方起松日高數尺入戶聞琴聲停步立苔石閒  
情契絕幽每坐忽終夕長揖道香清歡言正蒲席

贄分宜縣丞吳子彥

道合無論見神交早為詩十年諸老盡一淡平生知池  
草今無夢山陰復有期絕疑汚具眼猶意得吾痴

蕭南軒

寄吳子彥歸江東

鳴鸞誰倚洞簫歌黃鶴樓前舊脫靴  
天上佳期今夕共江東歸思白雲多  
清風明月故人識有酒無魚良夜何  
莫學鄉音唱蘆葉桂花滿載待西河

寄黃尚雅

莫惜隔年期行當與子違門深紅葉字  
秋入菊花詩酒熟蟹將到鱸肥鱠可思  
西堂風露重早下讀書帷



元風雅前集卷十一

欽定四庫全書

元風雅前集卷十二

元 傅習 編

先一初

丁丑新正試筆

屈指遽年逝今朝厯又新  
野烟痴作晚山雨細勻春  
舉世貧為苦空門懶是真  
聊將雙碧眼跌坐閱時人

陸文圭

燒笋賦

竹字韻

先生朝盤厭苜蓿笋味得全差勝肉蒼頭掃地犀角出  
赤燄燒空龍尾禿土膏漸渴外欲枯火灰微濕中已熟  
撥灰可惜衣殘錦解籜猶憐膚擢玉青青無分長兒孫  
草草為人供口腹李家丞相蒸葫蘆石家美人煮豆粥  
去毛留項有何好搗韭作齏空自速不如野人工食淡  
自辦行厨入脩竹句裏曾參玉版師胸中會着簞簞容  
主人不問不須嗔昨夜西風响林屋

陳魚村

題接仙樓

五老峯前第一山  
天開綠野待公閒  
令威白鶴重來日  
老子青牛又度關  
花木四時三月裏  
樓臺一簇五雲間  
我來便有凌風想  
為問先生覓大還

易炎正

環秀樓

倩碧穹環類九疑  
危樓空翠接清漪  
山人本是山中客  
山外看山山更奇

張嗣良

尋梅

夢中寄荒遐騎驢一訪故野梅過流水香斷無尋處天  
寒歲又晏偃蹇傷幽素獨行山谷深積雪迷歸路

曉行

夢魂短短春宵殘喈喈難語催征鞍東方彷彿淡月曉  
柳露細拂征衫寒僮僕前行指予路那個長亭經某處  
離情莽莽又分明黯淡孤村烟半樹



何大虛

吸步作

陰靄通烟碎作霏春風吹入暖成泥女郎挑菜不知濕  
調笑相攜過水西

除夜

風縈縈雨霏霏寒輕新柳潤春到落梅稀筠簾入市買  
紅燭烟火松林人醉歸

元日

聖主龍飛肇紀元野人相賀扳扉前不知顏色老昨日  
共說時光強舊年井口杏花春值雨塙筐柳葉暖肥烟  
長溝緩繞風漪綠林下烏犍漸受鞭

寄程承旨

元凱同嚴召留班錫異恩聖神思治切宗社有公存地  
立鼇峰峻天依鳳闕尊皋夔謀道合旦奭共心論妙幹  
時雍化丕揚祖烈敦堯文嚴大典虞求倚昌言卦氣丹  
凝鼎星符紫照垣奇齡歸碩德寶厯肇皇元花竹蕃三

谷雲霞煥九門相望清晝永朝下酒楹搏

訪貢待制舟行阻風

今旦始自信余生非數竒懷人發清興欲雪成良時波  
响雙擣澁灘寬衆帆馳危查立小渡淺竹懸斷旗指浦  
見鴉合轉蓬惜蜂移深烟曲江罄微雨三洲炊寂間有  
餘適濛濛無定姿余寧不可柰久與西山期

送吳主簿之官石塘

簿領池州去開帆帶雨微當今公事簡見說縣人稀雲

入九華碧雁驚秋浦飛丁寧橋下水官滿載書歸

次韻寧志道表氏偕庵夜興

空庭山色重積此松挂陰微風從何來一鳥驚前林清  
心有密契幽聽得遠音寒燈照孤館歲晏夜偏深

送人歸臨川

金河疎樹外去掉响流澌為客有歸日送人愁別時寒  
雲隨雁遠南雪到山遲舊隱書無恙行藏莫豫期

酬揭曼碩重贈

歲晏君獨留路長我將發林居難共語帝里易成別煮  
水逐人飯依樹因車歇今夜抱琴眠街頭响鐘絕

遇曼碩有贈

十年相勸忽相贈猶記書題狎故人京闕詩傳多應制  
里門祿逮獨榮親梅花滿映林霏雪柳眼初迎輦路春  
知是高情難去任此身誰是自由身

程學士山房宴集

芳郊暖微煦衆岫分餘烟迤邐望遠壑趣歸心轉延洞

門石扉灰澗阮衆流喧居人隱古俗香氣通幽禪艷綠  
度畫梁語笑相後先飄飄縱飛屐松聲正鏘然窈窕山  
曲拂麗構朝霞鮮勳庸在廊廟傑客儲芸編緬懷康樂  
公寄蹤此周旋詎知有今夕聯集玉堂仙羣鵠亦與喜  
共舞芳樽前無情尚方感矧當後諸賢暢飲抱真適遠  
以寄微言茲遊即千載湛輩期相傳

贈元復初

暖雲流青堤光風轉芳甸遠在天一涯幽沉限聞見點

點秋歸鴻翩翩春來燕天路萬里通胡寧絕遐睠竒姿  
奪南國悵望愧踈賤良會慰夙心願君畢歡宴

梅

竒植遺山澤英姿照古今釀熏滿三極貞色照平林年  
運神孤王陰凝力獨任太清涵妙影元氣托芳心薄雪  
村村淡輕烟澗澗陰蒼茫何見晚邂逅却愁深南紀開  
春事幽情寄碧岑自憐餘短策相對發清斟

元真寺橋小憩

古刹傳清梵橫橋雨歇時年華流水去春事落花知  
宇宙遺陳迹江山今後期向來多薄命今日信枯藜

柳下

是誰安宅子占得綠楊陰山色春來長溪流雨後深  
樹遙飛鳥疾人近戲魚沉舟子舡頭望安知不解吟

陳晉齋

次滕玉霄韻

自是男兒志四方明時上國快觀光儒冠誤我青綾被



人品還君白玉堂  
取友平生半區宇  
論詩今日得濠梁  
歲寒只有梅和竹  
風雪相看味更長

呈草廬吳司業

斯文樑棟在成均  
自許儒冠可立身  
拍塞胸襟五經笥  
清高地位十分春  
泰山北斗道行世  
赤箭靈芝意自新  
多謝春風薦賢筆  
肯甘躍冶外陶鈞

甘虛庭

贈羅浮山

吾聞羅浮山中人，綠樽吸盡梅花魂。  
花間騎鯨度海門，吟詩小住江南村。  
詩中有時得相見，雪中何年得白戰。  
一朝文運天門開，布衣飛上黃金臺。  
嫦娥却忌君年少，未許青雲致身早。  
鬚眉半染燕山秋，萬里歸來風格老。  
我家大白青海湄，與君邂逅荷花溪。  
大椿庭前酌美酒，長松石上看殘棋。  
浩歌白雲動，長嘯青雲飛。  
篝燈便共談秋雨，喚起英雄語。  
千古古來將相皆神仙，劉侯諸葛青雲士。  
我願君今重努力，天上風雲生羽翼。  
萬花立馬

看遊龍錦袍露染天香濕功名得意早歸來攜手三山  
弄明月

凌虛谷

秋夜長

秋虫嘖嘖寒沙底城頭秋月白如水二十五絃秋夜長  
點點滴斷離人腸萬里一身風露涼家家秋砧搗衣忙  
行路難

日月高懸天闕裏何曾照着幽泉底不見靈均伍子胥

忠臣翻作啣冤鬼自昔拙人遭譖讒多因踈豎簸唇齒  
片石鉗如巨闕鋒寸心險似瞿塘水行路難行路難羊  
腸九盤那可攀只愁平地生嶺岼

高孤雲

午過半間僧室

入門聞香風一樹桂花吐方丈半鈎簾空山度疎雨銅  
爐上秋烟茶甌到賓主對景適忘言齋鐘報亭午

觀畫山水

遠樹幽幽屋平沙款款人片天殘雪意一墨萬山身意  
到形臻妙工深筆有神高堂風日永展玩四時新  
怒石分雨水奇峰入半天野橋歸去路疎樹有無烟取  
用非工到精神在意傳道心少終日物我趣忘年

蠟燭

取質蜂甜後融春火力深直中元有骨明處本無心花  
吐燒紅日龍盤照夜金剪殘更漏永樓月度高林

應居仁

題歐陽氏楊妃春睡圖


咸陽宮殿開東風上林花發千樹紅啼鶯語燕弄白日  
太真嬌痴睡正濃九華帳暖揜不掩鬢髯釵橫慵整點  
翠衾薄籠冰雪膚寶枕痕深紅玉臉三郎要與遊陽臺  
蹊蹠曳踵床前來擁扶持女逼卧側惺惚困眼初半開  
畫工會此無窮意寫向屏帷留後世憑誰喚取春夢回  
漁陽鼙鼓聲如雷

送黃錄判宣城之官

紫髯秀美黃使君逸志雄材卓不羣  
北上奎章朝天子東遊寧國佐參軍  
征帆千里長江水官舍三年疊嶂雲  
相望柏臺應不遠好將政治播殊芬

送舅氏楚山樂教授之金陵謁夔御史

金陵形勝壓江淮舅氏斯行亦快哉  
況有故人驄馬客能無新句鳳凰臺  
風高薦剡天邊去雲擁除書日下來  
遙想歸帆應快意江頭江樹發寒梅



元風雅前集卷十二